



Chuig: Údaráis Bhainistíochta na mBunscoileanna aitheanta, na Meánscoileanna Deonacha aitheanta, na bPobalscoileanna aitheanta agus na Scoileanna Cuimsitheacha aitheanta sa Scéim Saoroideachais

Maidir le: Socruithe le haghaidh Deontais Seirbhísí Coimhdeacha (lena n-áirítear Deontais ón gCiste Tacaíochta Seirbhísí Scoile, Deontais Bhunúsacha Rúnaithe, agus Deontais Rúnaithe ón gCiste Tacaíochta Seirbhísí Scoile) **a íoc le scoileanna a bhfuil a ndeontais le hathbheithniú.**

Íocadh cistiú deontais choimhdigh (**lena n-áirítear Deontais ón gCiste Tacaíochta Seirbhísí Scoile agus Deontais Rúnaithe**) leis na scoileanna sin – i.e., Bunscoileanna, Meánscoileanna Deonacha agus Pobalscoileanna agus Scoileanna Cuimsitheacha – nach bhfuil a ndeontais le laghdú toisc nach bhfuil acu aon rúnaí deontaschistithe a d'aistrigh chuig párolla na Roinne ó mhí Mheán Fómhair 2023 i leith.

Is é cuspóir an fhógra seo scoileanna a chur ar an eolas faoi na socruithe le haghaidh deontais atá amuigh a íoc leis na scoileanna sin a fhostaíonn rúnaithe a d'aistrigh chuig párolla na Roinne i mí Mheán Fómhair 2023. Laghdófar an deontas coimhdeach atá dlite do na scoileanna sin chun go mbeifear ag teacht leis an bhfíric nach bhfuil siad ag íoc na mball foirne sin go díreach a thuilleadh.

Cé go bhfuair scoileanna thart ar 70% den deontas atá le híoc sa bhliain 2023 cheana féin, is eol don Roinn go bhfuil gá ann leis an gcistiú deontais atá fágtha a eisiúint i mbliana.

Socruithe laghdú deontais don chuid eile den bhliain 2023.

Thug scoileanna mionsonraí don Roinn faoi na tuarastail a d'íoc siad le rúnaithe deontaschistithe a d'aistrigh chuig párolla na Roinne ó mhí Mheán Fómhair i leith. Tá an fhaisnéis sin á húsáid anois chun an chuid eile den chistiú deontais choimhdigh don bhliain 2023 a íocfar an mhí seo a laghdú. Tá achoimre ar an socrú leagtha amach thíos.

Deontais chomhardaithe a ríomh	Bunscoileanna	Meánscoileanna Deonacha	Pobalscoileanna agus Scoileanna Cuimsitheacha
Deontas atá fós le híoc	An chuid eile den deontas coimhdeach, i.e., tá ceithre dhódhéagú den deontas bliantúil á n-íoc anois tar éis ocht ndódhéagú a íoc i mí Aibreáin 2023	Tráthchuid mhí Mheán Fómhair den Deontas ón gCiste Tacaíochta Seirbhísí Scoile, den Deontas Bunúsach Rúnaithe, agus den Deontas Rúnaithe ón gCiste Tacaíochta Seirbhísí Scoile	Tráthchuid mhí na Samhna den Deontas ón gCiste Tacaíochta Seirbhísí Scoile
Lúide	(An tuarastal bliantúil deontaschistithe + an tÁrachas Sóisialach Pá-Choibhneasa (ÁSPC) ón bhFostóir a sholáthair scoileanna don Roinn i leith na Rúnaithe sin a d'aistrigh chuig Párolla na Roinne i mí Mheán Fómhair 2023) ¹ ÷ 12 mhí x 4 mhí		



Nóta 1: Cuireadh mionsonraí faoi na tuarastail sin ar áireamh i gcumarsáid a d'eisigh Rannóg Párolla na Roinne le déanaí maidir leis na riaráistí tuarastail is iníoctha le scoileanna don scoilbhliain 2022/23. Ba cheart aon cheisteanna i ndáil leis na tuarastail sin a sheoladh chuig an Roinn, mar atá luaite sa chumarsáid sin.

Tabhair faoi deara gurb amhlaidh, i líon beag cásanna nach bhfuil mionsonraí faoi thuarastail dheontaschistithe ar fáil iontu, atá an laghdú bunaithe ar na huairanta a oibríodh sa scoilbhliain 2023/24 agus ar an ráta íosta €13 in aghaidh na huairte a comhaontaíodh mar chuid den phróiseas eadrána i ndáil le pá Rúnaithe agus Airíoch deontaschistithe Scoile. Féach ciorcláin [0076/2018](#) (Bunscoileanna) agus [0077/2018](#) (Iar-bhunscoileanna) chun tuilleadh faisnéise a fháil faoin ráta sin a raibh feidhm aige ón 1 Eanáir 2019.

Ní bheifear in ann an cistiú deontais choimhdigh sin a scaoileadh chuig an líon beag scoileanna nach bhfuil an suirbhé curtha ar ais acu go fóill ná chuig na scoileanna sin ar ina leith a d'iarr an Rannóg Párolla faisnéis bhreise nach bhfuil tugtha go fóill, agus é mar aidhm leis sin ró-íocaíochtaí a sheachaint. Iarrtar ar na scoileanna sin an fhaisnéis sin a chur isteach mar bheart práinne chuig secretaryreturns@education.gov.ie.

Déanfar socruithe le haghaidh an cistiú sin a scaoileadh chuig na scoileanna sin ar an bhfaisnéis ábhartha a fháil.

Laghduithe ar íocaíochtaí deontais amach anseo

Ní dhéanfar aon laghdú ar chistiú deontais caipitíochta.

Tá obair ar siúl chun teacht ar mhodh le haghaidh caighdeánú a dhéanamh ar an laghdú ar na deontais choimhdeacha san fhadtéarma i gcás go bhfuil rúnaithe scoile á n-íoc ar phárolla na Roinne. Mar a cuireadh in iúl roimhe seo, rachfar i mbun idirchaidrimh le Comhlachtaí Bainistíochta scoile chun plé a dhéanamh ar na socruithe seo chun a chinntiú go mbeidh siad chomh réasúnach agus chomh cothrom agus is féidir do gach scoil, agus tabharfar tuilleadh mionsonraí do scoileanna faoi na socruithe sin a luaithe a bheidh siad ar fáil.

Ceisteanna

Ba cheart ceisteanna maidir leis na socruithe eatramhacha le haghaidh an chuid eile de na deontais seirbhísí coimhdeacha a íoc a sheoladh chuig sdfinfo@education.gov.ie.

Scríobh “Laghdú sealadach ar an Deontas Coimhdeach” i líne ábhair an ríomhphoist.

Is mise le meas,

Gavan O’Leary

Rúnaí Cúnta

20 Nollaig 2023.